



**Sud Bosne i Hercegovine**  
**Sud Bosne i Hercegovine**

---

Broj: S1 3 Iž 038408 20 Iž  
Sarajevo, 27.10.2020. godine

Sud Bosne i Hercegovine u Sarajevu, u Apelacionom upravnom vijeću, sastavljenom od sudija Mirsade Džindo kao predsjednika vijeća, Zvezdane Antonović i Vesne Trifunović, kao članova vijeća, odlučujući o žalbi Stipe Šarića, Donjožabljačka 67, Žabljak, Livno, Bosna i Hercegovina, izjavljenoj na odluku Centralne izborne komisije Bosne i Hercegovine, broj: 05-1-07-1-998/20 od 01.10.2020. godine, o utvrđivanju i objavi broja birača upisanih u izvod iz Centralnog biračkog spiska za glasanje izvan Bosne i Hercegovine za Lokalne izbore 2020. godine, na nejavnoj sjednici održanoj dana 27.10.2020. godine donio je

**R J E Š E N J E**

**Žalba se odbija.**

**O b r a z l o ž e n j e**

Odlukom Centralne izborne komisije Bosne i Hercegovine, broj i datum navedeni u uvodu, podnosiocu žalbe odbijen je upis u izvod iz Centralnog biračkog spiska za glasanje izvan BiH za Lokalne izbore 2020. godine, za ukupno 27.960 birača po prijavama podnesenim do 01.09.2020. godine.

Protiv ove odluke žalitelj je izjavio žalbu u kojoj navodi da je putem e maila slao za njega i suprugu potpunu prijavu i dokumentaciju za dopisno glasanje iz Hrvatske, na izborima u Livnu, ali da ih nema popisu glasača.

Centralna izborna komisija Bosne i Hercegovine dostavila je ovom sudu odgovor na žalbu u kojem je predložila da se izjavljena žalba odbije kao neosnovana.

Ispitujući pobijanu odluku u okviru žalbenih navoda, vijeće Apelacionog odjeljenja Suda Bosne i Hercegovine je zaključilo da žalba nije osnovana.

Prema stanju u spisu, Centrala izborna komisija je prije donošenja ožalbene odluke, a prilikom razmatranja prijave Stipe Šarić dostavljene dana 31.08.2020. godine putem e-mail adrese stipe.saric@gmail.com, prijava za glasanje izvan BiH- Lokalni izbori 2020. godine (PRP-1), utvrdila je da dostavljeni dokaz o identitetu – kopija prednje strane lične karte, nije validan dokaz o identitetu, te da se Branimir Radaš mogao putem internet stranice i info linije Centralne izborne komisije BiH informisati o statusu njene prijave za glasanje izvan BiH i na taj način otkloniti nedostatak koji ogleda u činjenici da nije dostavio validne identifikacione dokumente. U ostavljenom roku nije dostavio validan dokaz o svom identitetu.

Ispitujući ožalbenu odluku u okviru žalbenih navoda vijeće je zaključilo da žalba nije osnovana.

Ovo vijeće konstatuje da je CIK BiH, prije donošenja ožalbene odluke, a kako je već istaknuto, putem svoje web stranice izvjestila žalitelja, da njegova prijava za glasanje izvan BiH sadrži više nedostataka, jer nije dostavljen dokaz o identitetu i ostavila joj rok da taj nedostatak otkloni. Podnositelj žalbe u ostavljenom roku nije postupio prema obavještenju CIK BiH. Naime, dostavljanje kopije prednje strane lične karte, se ne može se smatrati otklanjanjem nedostatka prijave.

Postupajući na način opisan u prednje utvrđenom činjeničnom stanju podnosilac žalbe je postupio suprotno odredbi člana 3.15 stav (1) Izbornog zakona BiH („Službeni glasnik BiH“ broj 23/01 do 31/16), kojom je propisano da državljanin BiH koji živi u inostranstvu, a ima biračko pravo u skladu sa Zakonom i upisan je u Centralni birački spisak, da bi se nalazio u izvodu iz Centralnog biračkog spiska dužan je da se za svake izbore prijavi CIK BiH. Prijava mora biti zaprimljena u CIK BiH prije roka koji odredi CIK BiH, u periodu nakon raspisivanja izbora. Uz popunjenu i potpisanu prijavu podnosilac prilaže i dokaz o identitetu i podatke o tačnoj adresi u inostranstvu, te izjašnjenje o opciji glasanja u diplomatsko-konzularnom predstavništvu ili putem pošte.

U konkretnom slučaju žalitelj nije uz prijavu dostavio sve potrebne i propisane podatke, tj. validan dokaz o identitetu koji bi potvrdio da su ispunjeni uslovi da se u smislu odredbe člana 5.12 stav (4) Izbornog zakona BiH nađe na izvodu iz Centralnog biračkog spiska za glasanje van BiH. Kao validnim dokazom o identitetu se smatra lična karta /osobna iskaznica ili vozačka dozvola ili pasoš/putnovnica Bosne i Hercegovine.

Takođe, napomene radi, žalitelju nije oduzeto biračko pravo za Lokalne izbore 2020. godine, nego samo mogućnost glasanja putem pošte izvan BiH, jer isti može glasati na redovnom biračkom mjestu u općini u kojoj ima prijavljeno prebivalište u BiH.

S obzirom na navedeno, po ocjeni ovog vijeća, pobijana odluka Centralne izborne komisije Bosne i Hercegovine je pravilna i zakonita, a žalba neosnovana, pa

je istu, primjenom odredbe člana 81. stav 1. Zakona o upravnim sporovima Bosne i Hercegovine (Sl. glasnik BiH br. 19/02 do 74/10) valjalo odbiti.

Predsjednik vijeća  
Sudija  
Mirsada Džindo